

Kurangkan Bercakap – Banyakkan Bekerja – Anjuran Tun Razak.

Di bawah ini disiarkan ucapan penuh Tun Abdul Razak bin Husin Timbalan Perdana Menteri Persekutuan Tanah Melayu tatkala membuka Seminar Bahasa dan Sastera yang diadakan pada 15 hingga 18 April 1962 di Kuala Lumpur.

Yang Mulia Tuan Pengerusi, ahli-ahli jawatankuasa Pusat Seminar, tuan-tuan dan puan-puan sekalian yang hadir.

Saya berasa amat suka cita kerana mendapat kehormatan berjumpa dengan tuan-tuan dan puan-puan sekalian. Saya ucapkan tuan-tuan dan puan-puan, yang telah datang dari beberapa negeri dan daerah untuk menghadiri seminar ini “selamat datang dan selamat bersidang”.

Begini juga saya mengucapkan setinggi-tinggi tahniah kepada Dewan Bahasa dan Pustaka yang telah mengelolakan seminar ini serta Ahli-ahli Jawatankuasa Pusat yang saya percaya telah mengorbankan masa dan tenaga untuk mengadakan persediaan bagi seminar ini.

Kita di Persekutuan Tanah Melayu sekarang ini adalah menghadapi zaman pembangunan negara, iaitu waktu dan ketika bagi kita menumpukan sepenuh-penuh usaha dan tenaga bagi mengisi kemerdekaan yang telah kita capai lebih kurang lima tahun yang lalu.

Di dalam kerja pembangunan negara ada beberapa aliran-aliran dan ada beberapa rancangan-rancangan yang mustahak mempunyai hubungan di antara satu dengan lain. Saya sendiri adalah bertanggungjawab menumpukan sepenuh-penuh tenaga di dalam lapangan kemajuan iktisad, iaitu lapangan bagi membaiki keadaan hidup rakyat, terutamanya mereka-mereka yang duduk di luar bandar, supaya mereka itu dapat mempunyai suatu

taraf hidup yang lebih tinggi dan lebih sempurna daripada yang ada sekarang ini, iaitu taraf hidup yang difikirkan bersesuai dengan keadaan kita sebagai satu negara yang merdeka. Dalam lapangan ini segala usaha dan tenaga semua pejabat-pejabat kerajaan, kementerian-kementerian, kerajaan-kerajaan negeri dan semua pegawai-pegawai kerajaan seterusnya telah disatukan supaya mempunyai satu tujuan bagi melaksanakan hasrat dan kehendak rakyat dalam lapangan kemajuan negara. Kerajaan Perikatan adalah berdasarkan dan percayakan kepada demokrasi dan bertujuan hendak membina suatu masyarakat demokrasi berkeahlilan (hak perseorangan), masyarakat demokrasi yang mengandungi rakyat yang mempunyai tempat dan kedudukan yang sempurna dan mempunyai mata pencarian yang sempurna.

Dalam lapangan kemajuan ini kerajaan, dengan kerjasama daripada semua pegawai-pegawai kerajaan serta rakyat jelata seterusnya, telah mendapat kejayaan yang memuaskan hati dan daerah di Persekutuan Tanah Melayu ini telah dapat dibuat perubahan-perubahan sedikit sebanyak dan rakyat di kampung-kampung telah merasa yang mereka cita-citakan beberapa tahun itu. Kerajaan Perikatan berazam bahawa perubahan-perubahan ini akan diperkuat dan dibanyakkan lagi dan kemajuan-kemajuan yang telah dapat dibawa

itu ditambah dan diperbesarkan daripada satu masa ke satu masa, sehingga semua sekali kehendak-kehendak dan hasrat-hasrat rakyat itu dapat dipenuhkan. Inshā Allah, dengan berkat Allah *Subḥānahu wa Ta’ālā* cita-cita dan keazaman kerajaan ini akan dapat disempurnakan, jika seluruh rakyat jelata memberi sokongan yang penuh kepada kerajaan.

Dengan adanya usaha dan tenaga yang dicurahkan oleh kerajaan terhadap kemajuan dan pembangunan negara ini, dan usaha-usaha ini akan terus dilanjutkan, maka sampailah masanya bagi pihak rakyat sendiri memberi kerjasama yang penuh kepada kerajaan dengan menimbulkan dan membangkitkan satu jiwa atau semangat yang dikatakan “Semangat Merdeka”. Rakyat di kampung-kampung, di luar bandar, dikehendaki membangkitkan semula semangat perjuangan dan semangat berdiri di atas kaki sendiri, semangat ingin hendak membaiki keadaan hidup masing-masing dengan menambahkan usaha dan tenaga sendiri. Sekarang tingkatan inilah yang sedang diperjuangkan oleh kerajaan, iaitu tingkatan kedua dalam rencangan pembangunan, tingkatan untuk memperkuat dan memperkembangkan semangat dan jiwa merdeka ini, semangat dan jiwa yang sangat mustahak jika penduduk-penduduk negeri ini hendak menjadi satu bangsa yang kuat, tegap dan yang boleh mempunyai tempat yang sempurna di lingkungan bangsa-bangsa asing di seluruh dunia ini.

Maka oleh sebab saya, sebagai menteri yang bertanggungjawab dalam hal ini sedang memperjuangkan, menumpukan tenaga dalam lapangan ini, pada fikiran saya sangatlah bertuah kerana dapat saya peluang pada pagi ini mengisyiharkan pembukaan seminar ini, iaitu seminar yang bertujuan untuk membincangkan cara-cara dan ikhtiar-ikhtiar untuk membesar dan meluaskan bahasa dan kesusasteraan kebangsaan kita.

Di dalam perjuangan kita untuk mendirikan suatu bangsa yang kuat dan tegap, bahasa dan kesusasteraan itu ialah suatu tiang yang mustahak selain daripada agama dan iktisad. Di atas beberapa tiang yang saya sebutkan itu, iaitu agama, iktisad, bahasa dan kesusasteraan, maka bahanbulah dapat kita membina suatu rumah kebangsaan yang kuat dan tegap, yang bersesuaian dengan kehendak dan hasrat kebangsaan kita. Di dalam Perlembagaan Persekutuan Tanah Melayu, Kerajaan Perikatan telah menentukan bahasa kebangsaan itu dijadikan bahasa rasmi persekutuan, dan mulai dari tahun 1967 akan menjadi bahasa rasmi yang tunggal di negeri ini.

Maka mustahaklah langkah-langkah diambil bagi membesar, meluaskan dan memperkayakan lagi bahasa itu. Oleh sebab itu saya sifatkan seminar yang tuan-tuan dan puan-puan adakan pada hari ini adalah satu seminar yang mustahak untuk memikirkan cara-cara hendak mengeluarkan buku-buku dalam bahasa kebangsaan dengan lebih banyak lagi, buku-buku yang berharga, yang berisi dan yang boleh menambahkan pengetahuan dan saya harap juga buku-buku yang boleh menanamkan dan menyuburkan dalam dada rakyat negeri ini semangat dan jiwa merdeka yang saya sebutkan itu, semangat berusaha dan bertenaga, semangat membawa kepada kemajuan dan kemakmuran. Buku-buku dalam bahasa kebangsaan ini dikehendaki bukan sahaja bagi bacaan am, bahkan bagi bacaan dan kegunaan kanak-kanak sekolah. Seperti saya katakan tadi kita masih lagi dalam zaman perjuangan, perjuangan untuk kemajuan, dan seperti perumpamaan dalam bahasa Inggeris mengatakan, pena lebih berkuasa daripada pedang.

Oleh itu orang yang menggunakan pena itu mempunyai senjata dan kuasa yang besar di zaman pembangunan ini,

dan dengan senjata itu dapatlah mereka itu membentuk

bangsa kita kepada rupa dan acuan yang dikehendaki.

Oleh itu saya berseru di sini, gunakanlah pena tuan-tuan dan puan-puan, iaitu kuasa yang besar yang ada di dalam tangan tuan-tuan dan puan-puan itu, untuk faedah dan untuk kemajuan bangsa dan negara kita.

Saya harap dalam persidangan ini tuan-tuan dan puan-puan bukan sahaja akan menumpukan usaha di atas pekerjaan-pekerjaan yang akan diperbuat pada masa yang akan datang, bahkan akan menyemak juga kepada pekerjaan-pekerjaan yang telah diperbuat pada masa yang lampau. Satu daripada cara yang mustahak kita jalankan dalam zaman pembangunan ini ialah mustahak daripada satu masa ke satu masa kita menyemak dapat kita mengatur langkah kita yang baru dengan sempurna.

Saya suka dan saya harap tiap-tiap satu perkara yang kita buat itu hendaklah kita fikir dan rancangkan dengan sempurna dan teratur. Hanyalah dengan adanya rancangan dan aturan yang sempurna dapat tiap-tiap pekerjaan yang kita buat itu dijalankan dengan teratur dan kemajuan yang kita akan capai dari satu masa ke satu masa itu akan licin dan sempurna. Saya bukan seorang ahli pena, dan tidak mempunyai pengetahuan berkenaan dengan mengarang buku-buku. Saya hanyalah seorang pekerja. Sebagai seorang pekerja, saya ingin kejayaan dalam apa juga kerja yang saya buat. Oleh itu dalam lapangan kesusasteraan ini juga saya yakin dan percaya jikalau beringinkan kejayaan, hendaklah pekerjaan-pekerjaan yang akan diperbuat itu dirancang dan diatur dengan sempurna, dan ditentukan tiap-tiap langkah yang hendak diambil itu.

Saya bolehlah menegaskan di sini bahawa tiap-tiap

satu keputusan yang akan diambil dalam seminar ini akan

mendapat timbangan dan tilikan yang sewajarnya oleh pihak

Dewan Bahasa dan Pustaka dan juga oleh pihak kerajaan. Akan tetapi hendaklah ketetapan itu mengandungi rancangan yang teratur, yang boleh dijalankan menurut tingkatan-tingkatan yang sempurna daripada satu masa ke satu masa.

Tuan-tuan dan puan-puan yang berkumpul di sini pada hari ini ahli-ahli pendidik atau guru-guru, ahli-ahli pengetahuan, ahli-ahli persuratan atau sasterawan dan ahli-ahli bahasa.

Oleh itu rasa saya cukuplah hadir di sini semua perkara-perkara yang berkaitan dengan bahasa dan kesusasteraan.

Oleh itu bolehlah kami sekalian, iaitu kerajaan dan orang ramai, penduduk-penduduk negeri ini berharap bahawa dengan berkumpulnya tuan-tuan dan puan-puan dalam seminar ini akan diambil buah-buah fikiran yang bernas yang akan membawa bangsa kita kepada zaman yang lebih mewah dalam lapangan buku-buku dan kesusasteraan. Saya harap kita akan mewah dengan buku-buku yang baik untuk segala jurusan dan lapangan.

Semenjak beberapa tahun yang akhir ini saya dapat di negeri kita ini perusahaan-perusahaan dalam penerbitan buku-buku dalam bahasa kebangsaan sudahlah mula maju. Ini tidak lain ialah kerana kejayaan kita menjadikan bahasa Melayu itu bahasa kebangsaan dan kejayaan kita meyakinkan bahawa masa hadapan bahasa kebangsaan itu telah terjamin. Pada mula-mulanya banyak buku-buku sekolah dan juga buku-buku bacaan untuk umum diterbitkan dengan tergesa-gesa untuk memenuhi kekosongan, iaitu kehendak-kehendak daripada sekolah-sekolah dan daripada penduduk umum menggunakan dan membaca buku-buku dalam bahasa kebangsaan. Kekosongan ini berlaku lepas sahaja kemerdekaan tanah air kita tatkala bahasa Melayu menjadi bahasa kebangsaan, bahasa pengantar di sekolah-sekolah,

dan menjadi satu-satu mata pelajaran di semua sekolah.

Kerja yang tergesa-gesa untuk mengisi kekosongan seperti itu memanglah biasanya kurang sempurna, kurang kemas dan kurang memuaskan. Pengarang-pengarang tidak ada masa untuk berhati-hati dan bersenang-senang menyemak dan meneliti apatah lagi mengadakan penyelidikan yang sempurna, sebelum menghantarkan karangan-karangannya kepada penerbitan dan penerbit pula tidak ada masa dan tidak ada banyak buku yang dipilih dan buku-buku itu dikehendaki dicop dengan seberapa segera yang dapat.

Keadaan seperti ini memanglah tidak dapat dielakkan dalam masa yang tertentu, masa yang kita waktu lepas merdeka dan keadaan itu menunjukkan kita semua bersama-sama mendukung usaha pembangunan bahasa dan negara di atas ikhtiar dan usaha masing-masing dalam lapangan masing-masing. Perbuatan-perbuatan ini sangat kita hargai dan kita hormati dan telah memberi kesan dan faedah yang tertentu kepada bangsa dan negara kita. Akan tetapi, pada fikiran saya, masa sekadar mengisi kekosongan yang saya sebutkan itu patutlah beransur-ansur diperhatikan. Ini bukanlah maksudnya saya kehendakkan supaya berhenti mengisi kekosongan buku-buku yang dikehendaki itu tetapi saya berkehendak dan berharap supaya kekosongan dalam lapangan buku-buku yang masih ada itu patutlah diisi dengan hasil yang lebih terjamin, lebih baik dan lebih bernilai.

Oleh itu saya rasa inilah dia tujuan yang besar yang tuan-tuan dan puan-puan sekalian hadir di seminar ini, iaitu menyemak balik pekerjaan-pekerjaan yang telah diperbuat, dan membincangkan bagaimana caranya buku-buku dalam bahasa kebangsaan pada masa yang akan datang ini dapat dikeluarkan dengan mempunyai isi yang terlebih terjamin, bahasa yang terlebih baik dan kesimpulannya terlebih sesuai dipandang dari

segi-segi pendidikan, pengajaran dan pembangunan semangat

kebangsaan. Dan lagi rasa saya yang menjadi tugas juga bagi tuan-tuan dalam seminar ini ialah membincangkan jalan dan cara mengajarkan bahasa dan sastera di semua peringkat sekolah, maktab dan universiti supaya pengajaran itu menunjukkan cita-cita membangunkan kepentingan kebangsaan. Fikiran tuan-tuan dalam hal ini tentu akan mendatangkan faedah bagi perancang-perancang pelajaran bahasa dan kesusasteraan kita.

Saya ucapan setinggi-tinggi tahniah kepada tuan-tuan dan puan-puan sekalian yang telah memberi pengorbanan untuk mendukung bersama pembangunan bangsa dan negara kita pada masa yang lalu dan saya berharap tuan-tuan dan puan-puan sekalian akan menjalankan usaha dan tenaga dengan lebih giat lagi pada masa akan datang. Akhirnya saya berharap tuan-tuan dan puan-puan sekalian akan dapat berbincang dan bermesyuarat dengan mendatangkan keputusan-keputusan yang berisi dan berharga untuk melanjutkan usaha bagi mengadakan buku-buku bagi pendidikan dan pelajaran anak-anak bangsa kita, supaya bangsa kita di Tanah Melayu ini dapat hidup sebagai satu bangsa yang bersemangat yang maju dan bertamadun. Dan lagi saya berharap keputusan-keputusan yang diambil itu akan dilaksanakan dengan sempurnanya menurut acara dan aturan yang tertentu yang boleh menjaminkan kemajuan dan kehasilan yang tetap dan tegas daripada suatu masa kesuatu masa.

Dengan ini saya ucapan "selamat bersidang dengan mendapat sepenuh-penuh kejayaan" dan saya dengan amat sukacitanya merasmikan pembukaan seminar Bahasa dan Sastera ini.